

# -KWA 'WCN ZII PÖ

Contes dan "gweetaawu

Baba Tiémoko Sébastien

Késsé Daniel



Société Internationale de Linguistique  
08 B.P. 857, ABIDJAN 08  
Côte d'Ivoire

Nous remercions infiniment l'AHS

Allianz-Hilfe Schweiz

pour le financement de la publication de ce livre.

-Kwa 'won zii pö

Contes dan "gweetaawu

© 1990 Société Internationale de Linguistique  
08 B.P. 857, Abidjan 08, Côte d'Ivoire

Tous droits de reproduction, de traduction et  
d'adaptation réservés pour tous les pays.

Dépôt légal n° 103426

Imprimé par la SIL à Abidjan

2e trimestre 1999

Dan "Gweetaawu / 2e édition / 200

'Sëëdhë ya- -ben zë -gen

'Ma- -bleesü pö 'sëëdhë -blesü 'a- -ben zë bha- 'gü =dhe me -wö 'ö me "dhi bha -yö -gla, "een 'ö me wo -kö -zian 'ka, -yö -gla. "Een -a -ga ka- bho bha =wë, 'ö gun kö "kwi 'yii nu =kö kwa -go "se ya- 'gü, -tosea kë -kö 'ö kwa dë -nu gun- kë sië- 'ka yö 'pö 'kwa- kë sië- -bha =dëe ya -ee? -Abin!

-Yö kë 'zü ka "yaan =dhe 'won "pepe kö- -ben -zë 'yaa zë -sü 'ka 'sëëdhë -ta kö- "dhiü 'to -mü.

'Won 'ö- -won 'gü 'yö -bedhe "gbugbu -nu 'ö gun kwa 'ziü- -nu -go yi 'bha 'ka -a 'gbe -dhe 'waa 'dhö 'zü =dëe bha 'yö bha.

=Dhe 'ö -kë =dhe -a -nu 'bha 'waa gun do sië -benzëdhe 'ka bha me 'dhe 'kö 'yii ö -bha -zon ö bhang -nu -dhe, =ya ga yi 'ö- 'ka -yö -ga 'pë bha- =gban 'ka.

'Me kwa ya kwa 'nëdhë kë "tüng 'gü, -kweazlan -nu 'wo gun- bho sië nu bho yean" "piü 'ö 'wo 'në -nu -zu bho- 'ka 'bhaa 'dhö 'zü, -a -kpodheng -nu waä- -piën -nu bha, me 'dhe kö 'wo bho sië =dëe 'wo 'dho sië "kwi -klang "dhiü bha- -nu 'bha 'waa yö -zë 'bha do 'zü.

'Won 'ö- -won 'gü 'yö yaa- Kisi Danie 'yi- "dhiü =wlüü- -bha kö 'yi 'sëëdhë 'në ya- -ben zë bha 'yö bha, kë "dhü kö -yö koo- 'në -nu -ta 'kun, kö kwa dë -nu wo -kö =gban 'ya 'dho =dheng- -nu -go "pëepedhö.

=Ya kë =dhe =ya kë Zlan -dhidhewon -zë 'ka, kwa -dho 'won "wëe 'gbe -nu 'ö -gban kwa wo -kö -nu -bha -a -nu -ben zë 'pö 'ö kwa bhang -nu -wa =draan. 'Kwa dho bhe- Zlan -dhe 'pë 'ö- -won 'gü yö -mü =sii =në- 'ka.

Baba Tiémoko Sébastien

**-Tong waa- Poo -a -nu -bha 'kpiidhe zaadhe  
'wo- -da**

"Tüng 'bha 'gü -a yi =ya =gwëë kö wü -nu -bha 'pödhe -yö -dhö. 'Yö yi do 'ka 'yö 'kpiidhe zaadhe -yö -da -Tong waa- Poo -a -nu =zinng 'gü. 'Yö -Tong -ya pö yö =në 'ö 'kpii-, 'yö Poo -ya pö yö =në 'ö 'kpii-. 'Wən bha 'yö -kë "gbü- -a -nu =zinng 'gü =dhe, 'yö -kë =dhe yöö kë "dhinaa 'ka.

'Yö- -nu -bha "sedë 'ö -kë Laabholaa 'ka bha 'ö- -nu -dhe kö -wo wo -bha 'kpiidhe bha- -gen bho.

=Dhe 'wo nu 'wo =loo mü 'yö -gblüdë -yö Poo dhee" kpö 'ö- pö: «Poo, -a pö "bhü 'i- wo i 'kpii- -Tong -go ya i -kë 'kpii- -ko kë -dhe? -Bhö ziö- 'gü =dëe yi -dhe kö 'yi- -go bho kö "taongdë -zë -nu =ple bha 'ka 'dho -siö ka 'ko -dhe.»

'Yö Poo -ya pö: «'Pödë -nu, ka nue", 'ka =gwëë- 'gü, kö 'pö- ya -a kplo -yö 'to ka =kweng bha 'aa -yö kë. 'Me 'ka dö bha -Tong "yan =në -ziö n 'gü "wëewëe, -a "dhi -yö 'to 'ö- wo "gbü- 'yö -kë, "këe 'yaa dö n -go -dhe 'bha 'gü. -A pö 'a- wo "dhü bha, -gblüdë, -a 'klöö- -mü =dhe ma -zë Zlan 'dhö n -da kö "se 'ö 'kwa- -ta =dëe ya 'yii- sa =kö kö -yö -kë "gbea 'ka =dhe -ko 'ö- -bha =dëe ya- 'dhö, kö -yö -tun dungdung 'ka kö "yi -ya =zinng 'gü =zinng 'gü, 'ma -ya -a dung do -ta n 'gü =ya ga, "een =nië -dhö 'dhö n kë sië. 'Yö 'ma -wlö 'ma dho -a do 'bha "dhiö, 'yö -kë n -to "sea- kë -ko 'ka. 'Pë 'ö -kë 'yö 'maa dö "ta -dhe 'ka 'yö 'a -wlö =në- wo bha 'yö bha.» =Ya kë "dhü -Tong -zë